

四庫全書

集部

欽定四庫全書

懷麓堂集卷十一

明 李東陽 撰

詩稿十一

七言律詩

橫塘春水

君家住在橫塘北
長見洲邊春水生
窈窕斜通山澗曲
分明直與釣磯平
比隣鵝鴨應無數
近渚鳬鷺亦有情

明日看花到南岼小舟搖蕩不須撐

團墩秋月

庾亮樓前月正明謝公墩上雨初晴清光照我雙吟鬢
此夜懷人萬里情隔竹流螢看不見繞枝羈鳥宿還驚
天涯一望鄉心切腸斷秋山笛裏聲

梅澗

地僻沙寒水更清老梅偏向澗邊橫風吹落瓣仍低隕
石壓傍枝却倒生野鶴對人輕欲舞蹇驢衝雪瘦能行

山翁只在中老看盡春光不入城

和寄莊孔易

同向詞垣直禁林每因公暇得招尋看花出郭春遊遍
刻燭留詩夜坐深世路風波無定所天涯時節忽驚心
松林步履歸來晚相憶空齋只獨吟

雪中懷張亨父

寥落城西生事微朔風吹雪灑人衣園林黯淡花將盡
海國飄零雁未歸防病只須知藥餌忍寒仍自關柴扉

無因得見滄洲子獨坐燈前夜話稀

鰣溪四景為汪刑部希顏作

蓮谷棲真

蓮花谷口見深宮聞說山靈住此中
鐘鼓過村春不雨旌旗翻日晝多風
柳榆鬼化千年樹偃僂人扶再拜翁
自笑乖慵違俗久也隨兒女問年豐

屏嶂凝烟

衆山烟霧有無中翠壁青屏面面同
草樹叢生春冉冉

峰巒欲散雨濛濛
高樓正合蒼茫坐
細路深愁窈窕通
醉眼忽驚無定所
亂霞殘照各西東

斗潭浸月

最愛碧沙潭上坐
幾看涼月可憐宵
山中草樹秋蕭瑟
水底魚龍夜寂寥
素女不眠愁把鏡
鮫人無語臥吹簫
謫仙醉醒歸何處
石上孤魂倘見招

芳村夜讀

蕭條城市不聞喧
杳杳書聲若箇村
空谷響餘虛籟遠

一燈深處夜堂昏
月斜孤枕長驚夢
雪打寒窗早閉門
此夜客中渾不覺
隔鄰南語教兒孫

答明仲次韻

平生高興入秋天
白戰曾驚在我前
詩為價高投屢惜
席因年長坐常專
南華老子空談白
西蜀詞人罷草玄
怪底相逢語言別
夜來藜杖有青烟

答奚元啓四首次韻

溪上柴門映水關
比鄰鵝鴨自知還
老年正坐詩中瘦

塵世惟應病裏閒
醉愛客來仍換酒
夢驚春到強登山
比來肺渴今安否
何日相逢解我顏

詩老龍門畫不關
東壇西社幾人還
看君秃筆何曾住
笑我高眠盡日閒
實怕行塵多似雨
更憐官馬瘦如山
無因一見春風面
笑把清詩對病顏

重簷寂寞閉雙關
俗客來敲到却還
寒燈照影獨自坐
童子無語對人閒
筆床書架此間屋
側屐短筇何處山
自笑迂疎久成癖
可能羞縮向人顏

小市春叢不到關鄰家兒女賣燈還幽人獨坐兩峰靜
啼鳥不來雙樹閒酒伴有期思白社俸錢無地買青山
春風萬里江南意夢裏梅花強破顏

答陸克深次韻

浮雲如雪亂春晴却怪行時路未平杜老霧中真潦倒
韓家花裏較分明星奴不逐窮詩鬼風伯空勞訟雨情
忽有清詩慰愁寂踈燈細字與誰評

竹林別墅

竹根茅屋兩三間
大阮風流尚可攀
林暝參差隨落照
野涼蕭瑟動秋山
騷人載酒春相過
稚子分泉夜獨還
從此不經州縣路
滿城桃李為誰顏

春寒二首

漠漠春寒尚不歸
朔風二月捲人衣
山中宿草深藏凍
塞外秋兵稍出圍
身病懶朝翻起早
世途無事失防微
城東十里郊亭在
把酒看春此意違

十日沙頭數雁歸
瘦軀仍却換冬衣
天清晝閣先聞漏

寒重霜林未解圍
北地人烟隨路別
東園草色傍春微
高城匹馬衝風急
書社蕭條事不違

自笑

鼓角聲寒不出樓
一燈無語照春愁
蒼茫却醒并州夢
寥落真停漢水舟
事偶隨人翻自笑
句非知己戒輕投
閉門只合昏昏醉
強飲無過一盞休

奉送樸庵先生歸湖南省墓

冉冉青衿白鷺行
十年趨走向門牆
文章北斗心長在

杖履春風坐不忘宮省樓臺通翰苑洞庭山水過瀟湘
故園只隔孤帆外有意扁舟繫草堂

送周梁石知廣德州

州居地僻簡逢迎作宦從前懶近名盡日鳴琴清里訟
一春騎馬看村耕曲江芳草年年路南國甘棠樹樹情
人說中朝官總好我今無補愧昇平

西山和許廷冕劉時雍汪時用三兵部韻五首
望斷胡塵忽此山五雲長拱帝宸閒龍門北去遙奔海

虎陣西來直跨關敵騎昔聞乘間入秦兵近報凱歌還
職方遂有觀風賦健筆無勞太史刪

鑑泉鱗石照無泥細草清蒲意欲齊寂寂坐溪看雨到
亭亭駐勒近鶯啼社中詩友驚頻換湖上山名問不迷
興發便須呼筆札酒酣敲側雁行題

春流曲折去還來細路縈迴合更開落落幽人愁未到
日斜歸鳥併相催祗園紺老雙林樹古洞青緣半壁苔
紅袖碧籠俱寂寂新詩讀罷重憐才

幾家烟火隔林微
林下相逢盡衲衣
老樹歌危當野徑
片雲輕薄駐巖扉
金床寶剎無年歲
碧海紅塵有是非
可待白頭成歛翼
高林未倦已知機

半嶺香臺石磴斜
諸空縹緲送天花
新開塔寺雄西郭
舊賜經幢出內家
避暑亭前泉帶雨
回龍殿下水明霞
太平天子無巡幸
頭白山僧誦法華

送王侍御用之巡按湖廣

帝遣臺臣出北州
繡衣青蓋擁行騶
傳詞禁闕雙龍曙

攬轡高城匹馬秋
吳地青山當楚斷
洞庭春水入江流
故園東下無多路
使節歸來是畫遊

秋雨答鳴治次韻

客情搖落竟難收
砌草墻花亦自秋
月盡俸錢隨例給
雨荒書屋借人修
哀歌莫倚王郎醉
短髮聊同杜老羞
馬上誦詩渾不忘
為君歸詠水西樓

竹軒為徐以道先生作

城裏青山竹外扉
先生於世本忘機
賢如阮籍非耽酒

與比王猷只布衣秋杖倚風高葉下夜窓聽雨一燈微
蒼茫歲晚交游別歎息林塘舊事稀

寄張亨父

芳草西郊懶駕車故人東海忽傳書篇章斗酒期空到
野宿山行計恐踈江上放舡春水發燈前彈劍夜堂虛
身名豈合終踈放辛苦窮年問卜居

齊夜董尚矩編脩出金橘菖蒲煎見餉和韵二
首

小試春盤百顆香齋燈燕坐及新嘗園林舊採黃金寶
風味猶清白玉堂千載帶酸僧有恨三更罷渴我能忘
應勞愛客頻沾灑清夢無因到石床

蒼山何處斲雲根露採風乾色尚存新製有方傳素手
清齋無意上芳樽材堪藥物還多賴名到詩家必細論
慚愧直廬三日臥蜜盤香筋屢過門

郊行戲效東坡吃語

荆扃棘徑俱交加澗葛膠結兼菰葭劍歌擊角叫急景

車轂過岡經幾家郊居近稼價減穀江館隔暮歸及瓜
感今激舊更矯顧關騎驚劫驚孤笳

過朱文鳴舊宅

生死論交竟惘然獨堪羸馬過門前黃金券後書空散
華館賓餘榻正懸解事小童悲識面承家稚子望增年
懷君刺有停雲句腸斷驚風為絕絃

送金德潤主事就養南京

南曹地僻迴無塵上疏多應為老親官有簿書還告沐

饌兼魚筍足冬春浦中碧草空離恨江上青山是舊隣
雙闕五年同奉引豈能無意送車輪

中元陪祀山陵有述

石徑巖扉入杳冥峰巒層複坐分屏天遺劍鼎神靈宅
地識河山表裏形虎衛旌旗晨擁陛龍宮燈火夜開扃
十年兩度陪鵷侶清廟歌成得再聽

黃土道中李員外同年留宿

雨澹荒溪野水昏蕭條鞍馬入空村平沙問渡逢漁子

深樹聞鐘隔寺門
白飯青芻非舊主
細泉嘉果得名園
東曹一榻分燈意
夜下虛庭白露繁

邢遜之先生輓詩

壁水蓬山共歲華
南宮地位切雲霞
金函一上迎鑾疏
玉節三隨奉使槎
賈傅有才終積譽
茂陵無病獨還家
行人落日襄陵道
隴樹悲風起暮鴉

古劍次韻

望斗樓空紫氣高
古來神物待人豪
化龍浪說歸閩水

新馬誰能借漢曹海內書生輕學武山中良冶半為陶
千金不買公孫舞猶恐書成損鬢毛

松江曹翁松趣軒

松江地盡草堂孤江上松林野徑餘聽繞泉聲風颭沓
步斜庭影月扶疎青山舊伴長留鶴白髮窮年自著書
日暮逢人問京洛五陵花柳意何如

馬上

玉珂朝散紫宸班馬上詩成按轡還近侍有名聊作伴

史才無用合教閒，狂過相府慵通刺。
貧住京華亦愛山，淺薄未酬升斗在。
漫將心事付朱顏。

立春日車駕詣南郊

煖香和霧繞蓬萊，彩仗迎春曉殿開。
北斗舊杓依歲轉，南郊佳氣隔城來。
雲行複道龍隨輦，霧散仙壇日滿臺。
不似漢家還五時，甘泉誰羨校書才。

送李太常之南京兼呈座主劉少卿先生

侍從親承舊賜袍，宦途遷轉十年勞。
來經劍閣丹梯險，

去識鍾山紫氣高北闕遙瞻當夜斗南陵分薦及春桃
文章座主今劉向相見無煩寄彩毫

送開州陳同知

十年塵土暗青袍作宦今看改鬢毛南國才名非汨沒
壯州民力正煩勞貧憐范叔惟塵甑貴識王祥有佩刀
春興不隨公事了絳紗籠月坐揮毫

晴洲釣者為兵部尚書程公作

一曲晴洲勝浣花尚書不似野人家溪頭雨過雲隨日

浦口鷗來水動沙詩興平生在泉石宦途憂國換年華
江南舊宅經遊地分付春風管釣槎

哭葉吏部

幾日風塵眼正昏忽聞哀報起開門聽餘空谷聲猶在
望盡中流浪始奔萊竹清風東署遠甘棠遺愛北州存
祇今耆舊摧殘甚那復能招此老魂

九峰書屋和曹時和韻

江上草亭新卜築已聞揚子著書成每逢社日聊隨俗

久住青山却有餘
霜入晚松經歲老
雨繁春筍過鄰生
小堂若許臨江閣
杖履無煩足馬迎

哭竹畝梅先生

早將名姓託文章
長憶春風坐玉堂
師席久虛唐祭酒
門生終哭宋歐陽
家無舊草留封禪
國有遺憂在廟廊
一代幾人今更幾
為誰成就却推傷

送文宗儒知永嘉和曹時中主事韻

永嘉地僻還依海
西到金華路復東
孤剎著山浮水上

暗潮乘夜入城中分封正合歸賢令述作君兼有古風
已辦牛刀供小試須知不數簿書功

和顧天錫九日病起韻

幾年清俸藉為郎病起空齋落日黃歲月半消書卷裏
鄉心偏近菊花傍門墻地僻秋生草砧杵城高夜擣霜
聞說簿書催更急未應瀟灑伴詩囊

送錢醫官歸鎮江

退食初回鴈鷺羣小齋詩卷坐斜曛官閒翰墨翻為累

歲晚江湖又送君鄉社衣冠猶近古故家醫術更斯文
金山寺裏鄰僧在應共孤亭望海雲

潘時用秋試病不終卷諗之以詩

一日長楊賦未成歸來臥病使人驚王嫱只隔君王面
李廣偏違塞上兵惱我不堪勞夢寐惜君非是愛科名
羽毛獨立秋風外不盡雲霄萬里情

送高按察致仕歸黃巖得雲字兼柬謝愚得

宦遊江海未逢君萬里乘驄舊所聞臺樹忽驚烏鳥夢

野心先赴白鷗羣人傳漢史東門畫我愛秦碑小篆文
歸向山中從謝傳定知塵世有浮雲

寄殷孝光表兄

風雨蕭蕭過北門夜堂燈火共清樽十年舊札寒暄少
兩世通家骨肉存江北地高鴻雁遠山中樹老桂花繁
別來無限青霄路何處相思是夢魂

和答鳴治見寄韵

悼亡
後作

獨坐寒燈如夢寐沈寥空館雁聲殘光陰隔眼三生易

塵事傷心一笑難
白雪冰絃懷舊侶
藥囊詩卷託微官
祇將顏色隨甘旨
漫拂新雛弄羽翰

送祁郎中順奉建儲詔使朝鮮

聖代山川盡海隅
朝鮮東面一藩如
冠裳舊入周王制
文字全通漢詔書
千里威儀瞻使節
萬年臣妾荷宗儲
茲行大抵關風化
四牡歌成意有餘

送李士儀歸宣府兼柬鄭克脩

士儀士
常兄也

壯年丰采動人羣
坐愛清風滿舊聞
卻是詩書還有種

繆家兄弟不如君移床夜散城東雨跋馬朝停塞上雲
因憶鄭虔遷謫久不勝吟罷立斜曛

齋夕尚矩編修出金橘菖蒲煎餉客豐前歲韻
二首

搖落江南幾樹香由來北客未頻嘗栽成雨足新苔徑
摘罷風低舊草堂朝省故人春共賞江湖幽夢夜難忘
枯腸坐覺清如水不待銅餅繫井牀

千歲嵩山石上根舊時風味此猶存堪隨杞實和仙餌

不學萼絲戀酒樽
秋逐艤船江上到
春勞楚客坐中論
盤餐幸有明朝約
匹馬朝回正過門

和明仲脩撰舜咨侍讀克勤侍講慶成宴坐上

聯句韻

是日以私服不與

長憶春筵賜坐時
禁門同陟殿東墀
盃分綠醕傳宣遍
舞換朱衣出隊遲
日月正瞻龍袞象
風霜齊肅豸冠儀
鈞天不是人間樂
回首青霄隔路岐

送蔣宗誼推官還紹興兼柬戴太守廷節

夜拂干將看斗牛送君何處獨登樓江東路轉家應近
天上槎回歲已秋雅興不隨山水放奇才端合廟廊收
文章太守勞相問又聽絃歌到幾州

西山雜詩七首

下馬溪橋散步行暑風絺紵入林清村穀野飯匆匆發
碧水青山面面迎踏盡平堤憐草綠到來幽谷見雲生
西湖勝事年年別幾日愁多不出城

幽巖脉脉細泉通百里宸遊是夢中樹底遊魚時見日

石間驚浪或兼風神靈尚憶蛟龍宅枯朽猶含雨露功

聞道官河新水足欲題書札問元戎

時會通
新河成

路繞山根斷却連亂藤深竹寺門前貧憐白屋蒸藜餉
倦愛清溪枕石眠載酒欲呼狂客醉留詩聊結野僧緣
深山六月無炎暑一坐西風萬樹蟬

路入西巖小洞天碧牀青磴許黃緣山中歲月空寒暑
世上緇黃亦化遷崖蘚剝餘猶有字石泓陰處欲通泉
相逢擬就湯休宿野性從來不解禪

望盡孤雲入杳冥翠微深處一茅亭高臺地迴秋先至
古榻僧閒晝亦局詩思更隨流水遠醉魂還為碧山醒
憑虛試徹凌雲調應有遊人下界聽

數頃湖田一半荒野人門巷日蒼涼鳩啼遠樹雲初合
龍卧深潭雨自藏幾處犁鋤當暮急誰家梗稻及秋嘗
蒲團竹几隨緣坐獨愛山僧午夢長

潭影蕭蕭碧樹寒一亭山色俯潺湲疎林隔寺聞僧語
落日登臺見鳥還塵事豈知明日異吏情應識野人閒

丹崖翠壁潘郎興長恨巉巖不共攀

雨睡得鳴治詩次韻奉答

十日長安陰復晴滿庭幽草亂愁生青綾夢蝶晨猶戀
紫陌聞雞夜亦驚顧影獨憐身似客對門應覺路難行
亦知散事非真隱猶有詩人憶姓名

祈雪齋居以病不赴雪後和鼎儀韻

禁廬通直愧無能伏枕偏驚歲月增好事每勞詩作賦
壯懷兼與病相凌熏爐夜永青綾暗水殿風高碧瓦層

惟有闕垣殘雪在憶君終夕望西稜

鳴治自齋居以詩來問風火之警次韻奉答

踈燈殘漏五更初回首驚塵入夢餘已愧焦頭為上客
始知容膝是吾廬垂堂尚憶千金重處世兼防百慮踈
賴有高情通問訊數詩清切慰愁予

送秦武昌廷韶

鳳凰臺上題詩去鸚鵡洲前建節行萬里山川佳麗地
六年江漢別離情悠悠曉夢塵隨馬漠漠春寒雨帶城

好種甘棠三百樹他時留詠漢公卿

和秦武昌赤壁懷古韻

楚雲荆樹擁嵯峨一棹曾衝萬里波時代不同嗟我晚
江山如此奈人何地從割據終全盛天遣文章為不磨
聞說宦遊兼弔古鶴樓東下水聲多

閏月二十七日再罹風火之警睡起疊鳴治前
韻

宿火重驚夢覺初浮生今得靜觀餘八千劫外竟何物

三十年來惟此廬甑未破時猶却顧虎曾談後豈全踈
北窓依舊清風在未必羲皇勝宰予

送孔公璜三氏學錄

泰山東望入層雲闕里門墻屢不羣六十年代來孫又子
二千年後我逢君虞廷禮樂新籩豆魯壁絃歌舊典墳
兩縣師模三氏學薦書先傍九霄聞

和鳴治韻寄乃叔愚得太守先生

楚江離思入芳年同泛滄浪一葉天藥裏自開緣我病

詩題偏得荷公憐已知昨夢非今日未必相逢是偶然
獨恨嵇康無一字可應曾著絕交篇

三月十九日師召邀飲適得家報生孫衆客喜
甚即席聯句書于堂壁歸疊前韻二首

我始生男君已孫且須傾倒共開樽風流頓合推前輩
弈葉還應大此門驥子幾時開道路散聲終日傍簷閣
從今阿囡稱郎罷更把方言仔細論

曉盤湯餅薦槐芽載酒同過內史家三世早知書有主

一翁真喜鬢無華夢中識面如曾見醉裏逢人或自誇
我亦居然大父行為渠翹望海東涯

次韻答邵戶部文敬前後得七首

忽枉東曹第一詩夜呼紅燭看烏絲郎官白壁元增價
翰苑明珠久見遺伐木每懷鳴鳥意投桃先愧鄙人私

張顛自有銀鈎筆不似公孫舞劍時

邵善草書
是日作楷

一代文章數首詩幾人贏得鬢成絲閉門頗笑陳無已
憂國誰憐杜拾遺滿座圖書嗟我病十年心賞荷君私

憑君直欲追風雅須到周南未變時

閣吏催成應制詩御香初散雨如絲西垣地切層霄半
秘府書存百代遺通集久懷明主賜負暄終抱野人私
多才獨愧東曹彥未有賢勞答盛時

城南風日總宜詩滿地楊花十丈絲五夜鐘聲應有恨
十分春色去無遺山川尚憶登臨晚樽酒長懷晤語私
白雪調高空悵望一樓殘雨夢醒時

來往郵筒不斷詩君才真似繭中絲詞華彷彿三王後

字畫分明兩晉遺得失寸心元自許品題今日豈吾私
吳江落木何須道渾勝當年未見時

春興無端久廢詩愁心終日亂如絲才疎頗覺非同調
韻險頻勞為拾遺時語未工猶好古官逋多負敢論私
疎毫短札匆匆甚又是西垣上馬時

葛巾芒屨坐題詩抵欠江邊一釣絲藥檢舊囊書欲遍
夢回春枕事多遺人情更與新年別草色寧知要路私
獨在捲簾深處望西山無數雨晴時

齋宿和鳴治韻

禁城鐘鼓報春遲
作宦頻驚節序移
藤几竹床三日臥
茗甌詩卷十年期
倉皇不負黃公意
淺薄終慚鮑叔知
共愛開軒坐明月
好雲多事莫相疑

又和王世賞韻

西垣香火奉嚴誠
坐久空窓白漸生
方朔歲年猶飽飯
子雲詞賦竟虛名
天臨華蓋春星近
月照方諸夜水清
忽有仙郎傳妙句
彩雲東望獨含情

送李宗衡還閩分題得淮浦聞鴻

戶部員外
時望之弟

淮上春深水接烟遙聞別雁下平川雲移遠樹猶回馬
風斷高城正繫舡杳杳北天誰作伴迢迢南夜不成眠
江湖不隔歸時夢消息應勞萬里傳

謝蕭文明惠榛子

野簇蹊叢滿地垂飽霜經雨亦多時長疑塞外隨車遠
錯恨山中結子遲竹籠舊封勞夜到茗芽香盞入春宜
知君情比投桃重不愛瓊瑤却愛詩

吳御史父封君輓詩

布衣肯受州縣郡白首不逢紈綺羣漢家循吏舊有傳
淮南小山誰製文西臺仙籍記芳桂北闕聖恩懷美芹
歲晚江湖憶耆舊哀鴻獨叫空江雲

雨和金尚德郎中韻

亂雲深樹雨聲稠委巷顏垣共積流平地堦除三尺水
暑風絺綌滿城秋兒童入市還高價新米論家豈壯憂
賴有比隣通問訊相過一見定無由

懷麓堂集卷十一

欽定四庫全書

懷麓堂集卷十二

明 李東陽 撰

詩稿十二

七言律詩

覽愚得詩卷有懷以弟之作悵然感之因用其
韻

楚詞招罷日昏黃不見幽魂為返香
寒菊有歌同薤露

秋風無雁憶衡陽
神交不隔江南北
塵世空驚夢短長
去歲茲辰那可問
不勝清淚夜燈傍

施醫官輓詩

三十年前爛漫遊
酒筵詩社憶風流
高名殷地來江左
舊業逢人說汴州
已見王郎為別駕
空傳謝朓有芳洲
惠山亭上留題在
露濕寒烟蔓草秋

午日亨父宅分題得蔗漿限東字以下五韻

紫蔗分漿出苑東
仙家元與御厨通
金盤畫永翻疑露

碧盃寒多不受風佳境惟憐江左客渴心誰識茂陵翁
芳時燕席頻繁送坐待西窓蠟炬紅

費司業廷言留飲題廂壁

壁水橋通別是天瀛洲東望亦登仙館中羣士有同輩

廷言自進士至
司業終九年

天下此官無剩員

南京舊多闕
惟北監一人

坐擁圖

書消暇日夢隨冠蓋入新年

廷言未受命兩
月予有是夢

班行舊會

今稀少莫怪相過意惘然

寄馬抑之同年

馬號清癡又號華髮
山人養病居蘄州

不見山人又幾時
浮雲流水杳難期
頭顱自白非因老
心事全消却未癡
賀監有船多載酒
浪仙無寺不題詩
祇應閒却經綸手
獨向空江把釣絲

邀用貞秋官不果至聞再宿明治南樓小詩奉
問

遠別多情近却無
幾回書札費招呼
三年舊雨虛來客
一枕清風獨負吾
未信紅塵催白髮
始知城市有江湖
西垣匹馬經過地
謝朓樓頭日又晡

予已邀鳴治既不果至且招予同宿未敢輒赴
用韻奉答

南樓清灑一塵無怪底高人不待呼行止古來真漫爾
主賓今日竟誰吾雲端紫蓋瞻前殿雨裏青山憶後湖
獨負兩京三載話短簷長日未能晡

復用前韻自慰

門掩空堂一客無雨聲驚夢若相呼眼中道路非前日
病起形骸是故吾翰苑朝回懷祕府洞庭家在隔重湖

繩床竹几將愁至自寫新詩到日晡

苦雨後和喬師召喜晴韻四首

壞籬頽壁幾家同苦雨無情也自公
白苧裳衣殘暑後
碧山樓閣晚涼中天風一掃愁雲淨
海月高懸宿霧空
滿席清光正回首桂花庭影夜重重

六月窮陰四野同憂時不羨魯僖公
農夫正恐秋將至
聖主深勞日過中陰氣漸隨金令伏
陽烏還照火雲空
猶憐怒雨號風夜破屋飛茅定幾重

杜陵廣廈萬間同千載江湖歎此公蹤跡久慚城市裏
夢魂偏墮雨聲中官河水決陂塘亂獨樹巢危鳥雀空
最是晚晴鐘鼓後夕陽依舊遠山重

急雨轟雷晝夜同枕邊驚夢起周公虛疑矮屋層簷下
如在歌帆飢浪中萬里山川秋霽合千家燈火夜愁空
人間月色清如水先照瓊樓第一重

立秋雨不止再和師召韻四首

一望頑雲萬里同長驅無乃困雷公神靈合在蒼茫外

物態都來頃刻中
媧女正愁天宇漏
鮫翁翻懼海濤空
美人只在蓬山上
咫尺瀛洲路幾重

溽暑蒸人伏枕同
愁來白髮恐難公
雨聲先到窮簷底
官事猶慚飽飯中
微物有心迴兩曜
弱雲無力度層空
陰晴欲問明朝事
知在著爻第幾重

閉門泥雨六街同
夙夜何由得在公
憂國祇憑書卷裏
放朝長憶漏聲中
烟連上苑千林暗
火照鄰家四壁空
寄語商羊休更舞
晚來愁見濕雲重

謀國憂民兩意同，獨於詩力愧諸公。
風謠合采歸天上，獻納誰能自牖中。
漆室婦嗟蓬鬢改，杜陵人去草堂空。
閒愁不獨風和雨，一日迴腸有萬重。

寄彭民望

斫地哀歌興未闌，歸來長缺尚須彈。
秋風布褐衣猶短，夜雨江湖夢亦寒。
木葉下時驚歲晚，人情閱盡見交難。
長安旅食淹留地，慚愧先生苜蓿盤。

贈傅神高訓導

彩毫和露寫清秋。親見江南顧虎頭。憔悴忽驚多病質。
賢豪今負壯年遊。眼前庶事誰工拙。夢裏浮生有去留。
萬里滇池三載別。重來還識故吾不。

寄沈提學仲律

沈侯高行迴不汙。偃蹇不受風塵呼。有時開口向知己。
寧肯折腰為大夫。高厓迅筆走風雨。落日解纜思江湖。
安得奮飛隘八極。與子汗漫遊天衢。

送周時可文選還南京用羅明仲席上韻

一月京華三見君
匆匆下馬立殘暝
朝辭內苑千峰雪
暮宿荒郊萬疊雲
宵旰席懷當宁寵
平安書報隔江聞
十年忝竊歲規誼
猶帶儒冠學綴文

宿海子西涯舊鄰

匹馬緣溪却度橋
華門踈樹影蕭蕭
東陵舊路元相接
北郭幽期豈待招
滿地月明如白晝
一燈人語共清宵
悠悠二十年前事
都向春風夢裏消

師召有旨馬售錢六百諭之以詩

六百青蚨十里才忍將筋骨付塵埃驚魂已脫池邊險

往事無勞塞上猜

師召已連失二馬

斗酒杜陵堪再醉

用三百青銅語

千金郭隗幸重來知公自是忌機者一笑能令萬事該

師召在內直誤繫牙牌角帶以去再贈一首

倦摩雙眼出長安束帶懸魚總誤看裝飾不嫌非異物
標題猶喜是同官酒防大白狂時換腰愧休文病後寬
堪笑玉堂叢話裏向來詩筆幾曾乾

若虛秋官舊有屋一區為積潦所壞數年不售

竟得銀四兩聞師召售馬自謂與此價略相近

索子用韻一首

臺署元非駟僧才直省金壁等浮埃顏垣已付池蛙管

賀客翻同野燕猜白老有詩行復問

樂天詩云江邊欲買三間屋問通人

家不
要詩

寇公無地去還來詞林馬價誰多少不待相逢意

已該

抑菴

為陳進士
炷乃翁作

簪組叢中老布衣肯將名字託光輝乾坤俛首平生足

貧賤驕人此意非曾哲更賢狂已甚武公雖老戒無違
亦知授簡趨庭地已見先生杜德機

候馬北安門外遊慈恩寺後園有感

亂溪流水入荒塍九曲灣頭十丈藤尋遍野亭無舊主
訪回蕭寺有遺僧蒼苔斷處看將合老樹栽時記未曾
莫怪疲僮淹送馬十年一到竟何能

雨後與文明遊城南馬上和鳴治韻

乳鳩飛燕總春聲我亦緣詩太瘦生十里烟塵新路繞

五更風雨舊愁輕
山亭坐近簷簷碧
水岸花開樹樹晴
不有黃門能愛客
幾人鞍馬得相迎

陳宗堯侍講輓詩

主恩前後許登瀛
君在同官是老成
千里鶯花南國夢
兩筵歌酒故人情
流光過眼成今昔
別路傷心隔死生
此夜玉堂風露裏
不勝清淚欲沾纓

宿西涯舊鄰次方石韻

春興無端入酒杯
每逢花鳥共嘲詼
望隨山欲斷時盡

行到水將窮處回雁影忽驚還北向馬頭誰遣更西來
夜闌秉燭蒼茫坐醉後真成夢裏猜

己亥中元陪祀山陵道中奉和楊學士先生韻

十首

十年三赴四陵朝又逐諸公一舉鑣龍尾道瞻回輦近
馬蹄塵送入山遙天開野色川原淨日出城頭霧雨消
無數晚花秋樹裏未須風物向春饒

數村烟火接荒墟芳草連天入望餘幾處桑麻還舊業

去年風雨憶空廬
疲童望路心兼遠
野老迎人禮大踈
獨向豐年詢往事
未堪回首意躊躇

葛衣葵扇一時新
自辦山裝學野人
踏盡柳堤行更遠
掃殘苔石坐還頻
蟲鳴水岼偏依曉
雁度山城正憶春
萬里炎蒸消欲盡
不勞風雨洗蒼旻

布衣人犯逆鱗
龍一代賢豪此地鍾
香火制存空古廟
策書名在有遺封
蕭蕭白髮餘民改
曲曲青山舊路重

欲向五陵還弔古
永安城外數聲鐘

劉黃昌
平人

地闢天開戶牖成古來人代幾回更四朝陵寢千年固
百里山川一掌平殿上朶雲當夜捧空中靈籟入秋鳴
重城複道香烟裏又聽雲車下紫清

夜深燈火下齋宮路轉西巘却向東四塞河山今古在
諸陵雲霧往來同烟叢簇簇溪藤暗秋葉蕭蕭嶺樹紅
獨愧兩都詞賦手玉堂椽筆待名公

馬頭殘夢不成酣似覺薰風為指南官燭罷燒猶有月
朝衣初脫尚餘嵐回鞭懶赴城東宴揮麈聊同石上談

記得曩時曾宿地翠微深處一禪菴

官曹行樂漫消憂得似周南太史遊巖勢繞空皆右轉
泉聲赴壑盡東流八方貢賦歸王甸萬古山名屬帝丘
同是鵷鷺飛宿地不應中有一沙鷗

路盡郵亭始入京水村山郭幾經行逢人借屋寧知姓
信馬題詩不記程沙浦雁回風忽斷石梁魚落水初清
瓊樓合在層霄外莫遣微雲綴月明

僕夫催馬劇如飛望近城樓及曉暉百里路方辭寢廟

兩宵心不離庭闌睡餘白日猶高枕拂盡黃塵更振衣
藤几竹床安穩甚任他風雨過書幃

昌平縣學新構翰林行館奉和謝學士先生舊
題韻留楊教諭顯爵夏訓導璉一首

石橋沙路隔東西宛轉如登十丈堤涼愛野風清別院
夜聞山雨過前溪棲鷺樹老多成實賀燕巢傾半委泥
好種琅玕二百箇重來須就節間題

和鳴治侍講贈行韻

玉堂人在閬西峰
應憶譙樓五夜鐘
海內萍蹤嗟我遠
夢中山色想君濃
書回直欲憑秋雁
吟苦誰甘學暮蛩
獨有勝遊兼樂事
不堪持為故人封

和亨大脩撰席上聯句贈行韻

行前一日亨大以采石一尊為

餞

石逕緣厓半入雲
獨開齋閣坐斜曛
層城夜闕諸山色
夾路人喧萬馬羣
屐齒不辭狂謝朓
帶圍真減病休文
豪遊竟作醒三日
長憶高堂舊酒醺

和汝賢脩撰贈行韻

樹影穿籬犬吠雲憶君同宿嶺頭照離歌忽漫傳新調
別馬猶疑戀舊羣秋館圖書違伴直夜堂燈火夢論文
不知聽雨亭前坐對酒看花日幾醺

和若虛郎中贈行韻

赤日黃塵馬倦行石橋山店有官程城頭路盡千峰隔
袖裏詩來兩腋清蟬雜柳風秋漸遠鶴翻松雪夜還驚
欲知小吏將詩意記取柴門剥啄聲

和趙夢麟主事東陵見寄韻

翡翠樓臺白玉堤，碧山深處有輪蹄。
神宮望接香烟際，閣道旋隨斗柄西。
萬乘旌旗雲外合，兩班環珮月中齊。

官曹莫歎東西隔，又聽星輶載紫泥。

時夢麟將有淮揚之使

內直大雨留壁上呈諸同寅

苑花庭樹隔蒼茫，急雨顛風驟作狂。
欹枕北窗驚夢短，移床東壁攢衣忙。
堂茅幸免三重破，堦水真愁一尺強。
寄謝諸公前後直，馬頭炎日漫辭長。

與顧天錫夜話和留別韻

時天錫謫永州府同知

路轉三湘去更深
潞河西岸潯
潯潛鱗自足波
潯地別馬長懷
秣飼心湘女
廟前山似黛
柳公亭下石
如林徵科亦是
公家事民力
江南恐未禁

以絲瓜饋李秋官
若虛誦瓜瓞詩
為祝若虛有詩
馮秋官佩之以
和章見索因用
韻饋瓜如例并
呈二君

地接東陵路不賒
冷官生計只籬
瓜閒行似愛涼
陰薄

醉筆多隨野蔓斜名自雅歌傳聖代例分風味與詩家
從今記取宜男祝賀客來時好薦茶

大雨次李若虛馮佩之屠元勲聯句韻

醉魂驚散眼花稠溜下空庭水亂流卧聽茅簷徹夜
坐看絺綌已先秋排空濁浪騷人恨蔽日浮雲壯士愁
郎署忽傳歌古調韻風含雨正悠悠

體齋宅賞蓮用體齋韻

獨坐幽亭數竹攢名花何意此相看一枝已分巢林足

寸步猶疑縮地難
香愛露華濃似酒
靜憐秋色冷於官
狂來却怪筒杯淺
直欲全傾翡翠盤

送王汝瑛院判歸省宜興

梅溪之水清無痕
梅溪主人花對門
閒花萬樹復萬樹
流水一村還一村
采藥路迷山遠近
讀書聲動月黃昏
欲知畫錦經行地
盡是天家雨露恩

和蕭給事元日早朝韻

庭燎光分燭影稀
玉階殘雪向春微
千官夜聽星辰履

九陞朝懸日月旗地切丹山聞鳳吹天開黃道見龍飛
海東才子多春興一日新詩動瑣闥

郊齋和張養直脩撰韻

煖風晴日麗層天霧駕飈車從列仙鳴鳳有岐還盛世
神龜出洛自何年朝班曉躡青霄上御氣春浮紫蓋邊
珍重玉堂清密地新詩莫遣外人傳

慶成宴有述

殿庭開宴引千官拜舞親承萬歲歡坐擁日華看漸近

酒傳天語飲教乾

每宴必傳旨云滿斟酒又云官人每飲乾

青雲舊侶班相

望白雪非才和豈難十五年來無寸補一心惟有向時

丹

和明仲洗馬韻二首

竹簡韋編次第評於君真見古人情百年事了須聞道
舉世嫌多為近名敢謂學非顏氏樂直將心比伯夷清
塵蹤滿地無由濯何處滄浪水上纓

友道陵夷繼者稀獨予才力尚卑微無成頗覺初心負

未老先知舊事非今日中流須砥柱幾年東壁有餘輝
期君合在風塵外千仞岡頭一振衣

上元日與文敬諸友遊神樂觀蒙典簿宅歸馬
上作

玉壺沽酒載青驄同向城南問老蒙誰信神仙有官府
始知軒冕是樊籠去年花在開應晚落日詩成意未工
歸到上元燈火夜九衢絲管聽兒童

春闈校文有作呈諸同考

省闈分職重持衡十載趨陪兩度行滿地奎光天咫尺
隔簾人語夜分明空中萬馬神俱驟海底遺珠夢亦驚
科甲少年今老大耻將名姓託羣英

沈禮部時暘行以隻鵝斗酒為餞家僮誤送于
顧刑部天錫時暘去始知之戲作小詩奉寄

隔城風雨送歸驂斗酒籠鵝意未堪何令別時無長物
殷郎書到只空函十年世事成春夢千里神交入夜談
他日相逢應大笑亂山深處是江南

送王成憲歸蘓州省母得難字

曉風殘雨送春寒一曲離歌意未闌
都尉府中新捧檄侍郎門下舊彈冠
貧憐菽水為歡易老覺江湖見面難
已辦彩衣隨畫舫風流未數晉潘安

送樊時登延平訓導

客堂寥落雨兼風一曲離歌目斷鴻
楊執戟生空識字李將軍戰竟無功
孤舟野岸蘋花發五月山城荔子紅
見說儒官非遠別夢魂長在浙江東

送桑民懌訓導泰和

民懌蘓人會試春闈策有胸中有長劍一日幾回磨

等語為晏檢討汝賢所黜又作學以至聖人之道論有我去而夫子來等語為丘學士仲深所黜今年得乙榜年二十二籍誤以二為五用新例辭不許遂有是命

十年三度試春闈新見聲名滿帝畿
甲第久慚唐李邵
奇才終誤宋劉幾
功名歲晚非蓬鬢
湖海官貧尚布衣
試看孤鷹下林落
甘心還向碧天飛

送宋民止綿州學正

民止民表進士之弟前翰林孔目公之子今年予校

其文中格用制額退在乙榜

已見珊瑚拂釣竿不勝遺恨滿江湍力窮魯縞心猶壯
望入蓬山路始難無奈風塵催短髮且將名字託徵官
青氍毹是君家物又向王郎坐裏看

送董子仁給事使琉球

琉球東望海門開聖代提封亦壯哉萬里風濤纔七日
六年天使此重來麒麟有服真殊寵薏苡無車莫浪猜
歸憶皂囊封事在殿前風來尚崔嵬

送張思履司副使琉球

尚方新報賜衣成玉節金書萬里行嶺外方言通異俗
島中烟火望孤城由來使者關風化親見朝廷錄姓名
不用殷勤宣聖德遠人先賀海波平

送王祭酒先生還南京

盛代聲名北斗尊錦袍牙笏舊承恩兩都詞賦多傳世
四海英才半在門紫塞天高連雁影石城江落見潮痕
金甌彩筆雲霄夢姓字應勞聖主論

和韻寄答陳汝礪掌教

寂寞天涯歎所依
海雲江月意俱違
茱萸歲改身仍健
首宿秋荒馬不肥
白雪屢傳新調寡
青雲半覺舊人非
家山不隔長安路
應倚南樓望夕暉

和師召步入西華韻

九衢香霧擁塵埃
望盡仙蹤隔草萊
蟬蛩影從橋底見
芙蓉花在鏡中開
碧桃黃竹無年歲
翠羽紅鱗自去來
幾度北安門外路
誤騎羸馬繞城回

寄劉時雍

望到關山白雁初離愁多在憶君餘百年交友通家誼
萬事傷心一紙書江上流民何日定里中羣盜可能除
西垣詞賦東曹業欲效賢勞愧不如

遊西城故趙尚書果園與蕭文明李士常陳玉
汝藩時用倡和四首

漫憶江湖萬里遊西園風景似南州青苔地濕頻經雨
白苧涼生不待秋塵事已醒前日夢歲華空白幾人頭
松醪載得渾拚醉莫遣飛花浪作愁

官曹無計可招尋坐愛林風滿素襟醉後頗思醒酒石
貧來須辦買山金花蹊柳徑稀疎見茗盃冰壺次第斟
欲問五陵歌舞地我家園樹得成陰

句入西園字字清葛衣紗帽稱閒行苔侵翠壁應全徧
果熟青林已暗生流水斷堤人共遠片雲孤鳥意俱輕
閒官愛說山中話為有歸田錄未成

殘樽繫馬立斜陽忽送秋聲滿樹涼花落始知留客久
雨來偏為作詩忙山堂竹戶寒猶閉石徑苔泥滑不妨

獨有園人愛沾灑不隨僮僕問歸裝

送陸封君歸大倉

鼎儀脩撰之父也

十年池鳳遠將雛白首飛揚興不無老去關心惟骨肉
夢來歌枕亦江湖山川尚憶重遊薊鄉里猶稱舊姓吳
畫舫載將官市酒却從林下說皇都

予素不善飲文明詩來有西涯爛醉欲人扶之
句日以二樽見惠步韻答之

夢斷高陽舊酒徒坐驚神語落虛無若教對飲應差勝

縱使微醺不用扶往事分明成一笑遠情珍重得雙壺
次公亦是醒狂客幸未羸豪比濯夫

送鄭瑤夫先生之南京太常

冰霜心事見平生冠冕文章動兩京直講舊官纔五品
太常新命接三卿園林俎豆春秋祭江海庭闈日夜情
近說詞臣多簡在御屏風上恐題名

送王元常貢士歸省河州

兵部尚書
公度之子

尚書門第切雲高西去秦山望眼勞朝論十年歸舊德

家聲今日在時髦
虛聞漢節求良馬
尚有任竿拂巨鰲
却望故園歸路杳
未辭塵土逐青袍

刑部郎中枯蒼金君尚德之子禧及其弟尚義
御史之子祺聞尚義將有謫命自其家赴京師
以予託交二君稱契家子來謁予重其孝友篤
至悵然感之賦贈一律

舊家門第有清風
眉宇分明似兩翁
春夢忽驚黃耳犬
秋風愁送玉關鴻
徐歌漫有臨岐贈
襦刺深勞昨夜通

薊北遼東俱萬里天涯回首意匆匆

懷麓堂集卷十二

欽定四庫全書

懷麓堂集卷十三

明 李東陽 撰

詩藁十三

七言律詩

幽懷四首

雨深門巷半蒼苔
十日幽懷鬱未開
剛道官閒忙又錯
偶教身健病還來
酒杯尚藉驅除力
詩債慙非應答才

猶有舊堂堪繫馬水邊鷗鷺莫驚猜

坐看幽意滿青苔雨徑烟扉濕不開
樂裏半封塵未掃棋聲欲定鳥還來
為園每課山僮業弄筆先憐稚子才
我瘦不緣詩思苦騷人相見勿頻猜

牆根老樹碧生苔門捲疎簾一半開
巖影乍晴雲欲散雷聲忽動雨還來
長堤隔水疑無路瘦馬衝泥念不才
朝往暮歸緣底事祇須形影自相猜

懶携行杖踏莓苔寂寂殘樽對雨開
開口祇應心獨語

閉門休問客誰來幽居有道堪藏拙巧宦逢時亦有才
試問白頭冠蓋地幾人相見絕嫌猜

林屋養高

王編脩濟之乃翁以光化知縣家居受封濟之歸省分題得此以所居洞

庭山有林屋洞

天之勝故云

隱君新拜紫泥牋許住東南一洞天老去折腰羞作縣
醉中因酒得稱仙門高剩有栽槐地年好多收賣橘錢
為報五湖風月道秋來須載彩衣船

送黃汝脩舉人還太平

文選郎中世顯之子

京國趨庭見少年別來風度已凝然亦知梗槩非流俗
未論簪纓有世傳坐上好書消歲月江南歸夢繞山川
桃溪太守今前輩長在春風几杖前

題敷五菊屏

先生深臥菊花叢曲几圍屏杳窅通本為紅塵辭俗眼
豈因多病怯秋風交情盡付炎涼外身計聊憑吏隱中
相過不嫌憔悴質祗應風味與君同

用沈仲律提學韻奉邀一首

行囊又掛佛堂燈可是緣詩尚愛僧江上踏泥三日屢
城南衝雪兩人曾別來事與流年異病起吾慙飽飯能
西望草堂三百步敝鞍羸馬到須登

夜坐有懷仲律

草堂寒日下虛簷露白風清此夜兼坐榻有塵僧為掃
客囊無計歲將淹詩成骨與山爭瘦老去心將玉比廉
還似鶴林蕭散地未容巾屨學陶潛

再次燈字韻

布袍書卷擁寒燈興味蕭條頗似僧
愛酒獨從醒處得戒詩惟有病來曾
幽棲借屋山人許再拜升堂稚子能
好是五湖烟水地幾時舟楫渺然登

用韻贈林蒙菴和仲律

時蒙菴以車駕郎中謝病將歸漳州

病來三月不窺簷老去心應吏隱兼
萬里江湖甘獨往一官書簿苦相淹
還尋陋巷貧中樂解使貧夫去後廉
獨立乾坤雙道眼靜看魚鳥到飛潛

與仲律飲鳴治宅用原博韻

偶陪驄馬遊三日復到城南意惘然山色見如逢舊友
菊花開不厭殘年幽居地接東陵近愛客心知北海賢
猶識舊堂曾下榻隔樓風雨賦詩眠

飲士常新居和席上聯句韻

寂寞官曹似隱居清風時動一床書花應旋種欄將滿
客不頻來席尚虛詩好忽驚傳錦字酒狂真欲換金魚
多情愧有東鄰卜已辦城西款段車

送程克勤諭德歸省尚書

楊脩家世本公卿庾信文章自老成館閣盡推良史筆
君王親記講官名金玉宸丁寧詔去馬歸舟日夜程
却倚三台看北斗鯉庭鸞掖正含情

戊戌冬至節初赴朝天宮習儀

翰林舊不習儀是歲有新旨學

士而下俱令依

常參官習儀

朝天宮闕路逶迤帝遣儒臣下赤墀禮重叔孫綿絕地
恩同文德押班時五更清漏聞雞早十里紅塵恨馬遲
館司幸多間歲月敢言筋力是吾私

寄莊孔暘二首

買斷溪南十頃烟還家無復夢朝天身如元亮歸田日
詩似東坡過嶺年蓬島謫來仙骨在釣臺高處客星懸
十年未洗江塵耳誰聽清風石上絃

背郭誅茅草蓋堂邊江種柳樹為牆舟中夢醒聞春雨
樓上詩成坐夕陽南紀壯遊餘歲月北扉遺草舊封章
清時例有逃名客見說嚴陵本姓莊

韓貫道黃門見示雪中遊泥鰕寺詩和韻一首

宛轉新詩出袖間
宦情幽事總予關
山迎舊路如相約
雪到今年始放慳
地僻不妨禪客夢
歲豐先動野人顏
空慙突兀東齋坐
如聽車聲帶月還

齋居和世賞編修韻

半夜開門雪滿坡
清吟無奈玉人何
人間路與紅塵隔
天上春隨翠輦過
靈吹下時神語寂
瓊樓高處曉寒多
笙簫本是虞廷樂
不為秋風起棹歌

文明黃門携大廟東宮郊祀慶成諸作見過和

韻一首

織翠華箋共列門
袖中烟霧尚氤氲
龍筵地與天顏近
鶴駕班隨輦路分
禮重園丘春載覩
歌成清廟夜還聞
鳳池雨露雖同沐
似隔蓬山一片雲

次韻原博新廬有作

卜築堂高迥出曹
牕風牀雨睡能牢
鷗夷不語聊相伴
襌襪多情豈見撓
迂叟樂應須水竹
醉翁心不在山醪
萬間廣廈君當見
似說蒼生屬望勞

若虛餽匏瓜仍疊前韻奉謝

野意相看總不賒園匏雖大亦稱瓜青叢摘罷烟仍濕
翠籠擎來日半斜吟有舊題成左券酌無清酒愧西家
郎曹興味清如此絕勝春風諫議茶

曰川餽無花果答絲瓜之贈疊前韻

翠籠珍果望還賒報我真應愧木瓜采掇恐沾秋徑濕
傳看不覺夜燈斜飽知實德非虛語脫盡浮華是大家
異物清詩兩奇絕渴心何必建溪茶

楊武選輓詩

楊名仕偉文敏公之孫謫台州通判卒于途其妻建安朱氏遣使乞

詩

十載長安夢未醒
離堂風雨思冥冥
書隨洛下舟中犬
身逐台南水上萍
衛國精靈應寂寞
郭家池館半凋零
寡妻稚子銜哀意
誰作張圓死後銘

大雨次柳邦用韻二首

雨聲吹送滿城秋
委地頽雲濕欲流
環堵不藏原憲病
窮途誤作阮生愁
燒殘官燭晨猶暗
落盡庭花晚更幽

此夜兒童如見月直應狂喘似吳牛

風伯何時許放慳雨師今日不辭頑
虛疑九道乾坤合坐遣雙籠日月間
滿地瓜田惟足水幾家茅屋尚依山
官曹况切懷人意一夜清詩強破顏

士常得男疊前韻奉賀

慶協充閭事不賒嘉期先報及時瓜
門深賀客車應滿喜極題書字半斜
周雅祝辭新故事李膺名姓舊通家
東樓若許吟詩到聯盡軒轅石鼎茶

饋瓜楊維二編修以桃見答疊前韻

手種丹桃歲月賒
感君投我勝投瓜
來疑度索山城遠
去恐天台石磴斜
已託神仙棲壽域
敢教兒輩惱鄰家
餐餘便有通靈意
不待盧仝七盃茶

饋瓜曾丈甫編修以冬瓜見答疊前韻

晚花秋蔓野堂賒
不道冬園別有瓜
未遣塔苔封徑合
肯緣籬竹掛簷斜
後時豈敢為君惜
多子還應勝我家
預報明年湯餅會
嘉期須及雨前茶

若虛夜饋瓶棗疊前韻

異代神仙事不賒如瓶丹棗勝如瓜多情饋客詩兼遠
急脚携筐步半斜內苑不勞方朔射西鄰還切少陵家
白頭正有分甘興先向高堂一薦茶

汝賢饋西瓜及檳榔疊前韻

漢使西還道路賒至今中國有靈瓜香浮碧水清先透
片逐鸞刀巧更斜飽德未忘蒙正饋為園翻愧老樊家
因君解取南閩俗更說檳榔可代茶

九月八日與謝于喬諸公遊朝天宮有作

細草蒼苔石路重偶從西郭問仙蹤
亭如逋叟長留鶴徑似陶潛但有松
塵世百年能幾見洞門今夜不須封
謝家屐齒應無恙擬上蓬山第一峰

是日和王世賞韻

厭見秋城捲暮沙還回仙路出西華
清憐竹笋宜供飯醉挿松枝且當花
閣苑烟霞非昨夢蘭亭山水似君家
新詩未穩還催就紙背橫書字盡斜

和馮佩之韻

百尺樓臺四面同烟霞深鎖洞門中
虛牕地迥猶含日破帽情多不受風
萬里碧雲秋興遠一番涼雨夜愁空
祇應今度來差早明日花開定滿叢

和謝于喬韻

疲驂舊路不勞牽十載重遊意惘然
丹竈藥成雞已化石牆陰冷鹿猶眠
仙蹤下與塵埃隔野色西來島嶼連
不似玄都易搖落秋來還有看花天

九日遊慈恩寺疊前韻

偶從農父問田塍又向禪家話葛藤久宦北南俱是客
頻來賓主更誰僧行憐馬上尋詩慣坐憶湖邊見月曾
到此慙拋塵土累敢言清世獨無能

九日和王世賞韻

石門惟許白雲留我亦何心戀此遊竹裏行厨烟未午
水邊蕭寺葉先秋行貪覓句忘吹帽醉去登高不上樓
詩景滿前誰會得野僧多是遠公流

九日和謝于喬韻

鶴翻風樹曉猶狂頗似任翻臥竹房石底片雲猶宿潤
竹間殘雨尚餘涼桔槔亭古荒秋草鐘鼓樓高送夕陽
猶有丹丘餘興在坐來今昨兩相忘

和李若虛韻

芋區瓜圃地相聯及徑多從斷岸邊鄰曲望疑沽酒市
兒時憶上打魚船年華未改先驚暮風景重來不及前
更說農家少生事一番秋水沒湖田

和屠元勳韻

杖屨城南得得來寺門今日許重開
溪流過雨蘋生岸林影翻風竹映杯
我醉不辭桑落酒僧高長住貝多臺
吟風賞月當年事莫作三生石上猜

題徐氏含暉堂

家住層峯直浪中水光山色動簾櫳
紅塵地少多逢石畫棟雲輕不受風
陶徑菊松今古在米船書畫往來通
濯纓誰和滄浪曲我亦無心謝此翁

再遊慈恩寺留僧琬畫卷

軟沙幽草接芳洲舊路重來問石頭
名似曲江題後到身如房琯夢中遊
山迎傑閣層層見水繞長橋曲曲流
吾祖汝師俱寂寞相逢茶話坐消憂

韓都憲公雍輓詩

早騎驄馬出烏臺萬里風雲亦壯哉
嶺海威名天下重廟廊謀算古人才
寧知晚節終泉石豈料英莧閼草萊
京國少年思識面楚歌聲斷使人哀

諸生有作紅葉詩者愛其末句戲為補之

碧樹凋餘老更紅
強將顏色慰飄蓬
濃霜未著愁先醉
返照初回望欲空
唐苑情多何足問
吳江句好更誰工
晚來蟻穴無歸路
應恨蕭蕭西地風

醉楊妃菊次韻亨父

誰采繁花席上題
偶將名姓託唐妃
日烘花萼醺時面
雨換華清浴後衣
隔坐似邀秦國語
揮毫未放謫仙歸
欲從顏色窺生相
已落詩家第二機

後園種菊經月忽見數花用亨父韻并呈城東
賞菊諸君子

幽花種得偶相忘步轉南簷却背堂但有芳心寧擇地
更無佳客亦宜觴登臨憶負重陽雨採掇愁沾昨夜霜
滿袖餘香試披拂晚來風力正悠揚

蘓人織蒲為茵二片置牀倚間藉背及足甚宜
冬寒凌季行以書見惠道經數五太史輒為所
留聊作小詩報季行并東敷五

輕蒲一簇軟如花巧織重鋪意未華吟處迥宜孤背倚
坐來溫愛兩趺加未沾南國佳人惠已落東瀛野叟家
幸有題封三十字慇懃留向手中誇

冬日對菊用陳玉汝韻

搖落霜空萬木飛一枝無奈賞心微未成老圃應須學
若在南山便合歸人道秋香非昨夜天留晚色共斜暉
陶翁可是忘機者猶自含情待白衣

與王世賞重遊朝天宮是日病臥待諸公不至

石徑苔深步屨空菊花開遍去年叢重遊誤落秋風後
舊事都消夜雨中已覺地偏非世界却憐身病是樊籠
諸公只隔瀛洲路未遣丹丘鶴夢通

和世賞韻

偶陪寒日坐空庭飯有胡麻藥有苓霜菊多情留暮色
風禽無語墮疎翎堦前藉草衣全濕石上題詩酒盡醒
莫笑山公歸太早祗緣多病想幽局

楊應寧母安人受封詩

老去逢恩不自知，半生勤儉鬢成絲。
家如夫子長存日，身似郎君未貴時。
拜憶登堂晨賀早，醉沾開閣夜歸遲。
百年桑梓瞻依地，一度生辰一獻詩。

送韓貫道湖廣參議提督武當諸宮觀

神仙官府意何如，親見分符上紫虛。
山擁帝宮三十六，地屯兵衛五千餘。
人言才大難為用，我愛官閒好讀書。
臨別與君堪一博，肯將青紱換緋魚。

謝邵地官汝學餽陶鼎次韻

感君攜贈出南裝別路相看似故鄉詩客品題新定價
野人搏埴舊傳方茅柴火底春風軟骨董羹中滋味長
秋去冬來幾寒暖且將麤糲送年光

汝學席上賦陶鼎疊前韻

山家形製樸無裝伴我頽然入醉鄉人境最宜林下一
丈筵何羨食前方不辭地僻江湖遠却愛官貧歲月長
幾見雪堂明夜火擬從東壁借餘光

王仁輔見和雪後西華聯句用韻答之

磴雲梯雪迥分層玉殿凋闌次第登敢向內園誇壯麗
似聞南客想炎蒸淡交情在貧應識白戰才高老定能
蛺蝶飛來誰解道當時獨有呂翁曾

再次王仁輔雪後韻

雪堂高聳玉樓層驢背寒多不奈登夜飲略教杯有酒
晨炊誰問甑無蒸長安病臥袁郎老野寺吟行賈島能
應恐出門無覓處沙頭記取屐痕曾

再次仁輔韻

曉風殘雪上堦層謝朓樓頭客未登紙帳不知寒日出
硯池初覺暖雲蒸關心遠道妻孥隔作伴空齋杖屨能
斗酒綈袍吾欠此贈君空有笑言曾

分題得孔林送張廷芳巡按山東

孔林喬木蔽高空岱嶽西來泗水通萬古山川神陟降
百王封秩禮尊崇詩書世豈坑焚後俯仰吾猶覆載中
却羨東巡張侍御得先瞻拜仰遺風

徐用濟秋官和雪詩次前韻并東仁輔

雪風吹透褐衣層望盡高臺不可登
蒲地茶烟猶帶濕
幾家藜火尚餘蒸
江湖意氣山人老
詞賦風流漢署能
塵土滿甬消不得
瓊琚欲報兩無曾

再次陶鼎韻答用濟諸君

重爐高蓋擁層裝
規製居然自一鄉
豪客休嫌下箸處
仙家不用辟寒方
味兼小市盤餐別
坐共嚴城漏水長
却有好詩如拱壁
搏工何意敢爭光

仁輔屢和雪韻而方石不至再用前韻督之是時

仁輔館于
方石官舍

雪裏幽懷百感層相逢聊復話年登帳中綠酒香應醉
鏡底黃精濕未蒸王子扁舟無興到謝家新句有人能
詩壇定與屏風隔夢裏高歌達未曾

李世賢侍講一產二子用瓜祝韻賀之

同官同姓跡非賒異事還應協我瓜池鳳水深相對浴
海桃枝重不勝斜絲絲周雅詩人頌袞袞徐卿積善家
留取秋菰薦春酒向來真愛一甌茶

向饋瓜世賢答云
謹當醃漬為菰以

俟他日湯餅之會
今不敢以薦茶也

再和仁輔韻

是日雪
將再作

雲擁高城雪意層蒼天欲問恐難登山家未報來年足
海國還聞瘴癘蒸勝事園林誰合鬧豐年歌頌我猶能
王郎更跋何門履十二街頭遍已曾

方石堅臥累日忽與仁輔聯句見答始悟其為
合從計賦此挑之

門掩高坡最上層

方石所居
名高坡巷

徑深泥滑苦難登歌殘白

雪無餘調夢醒黃梁第幾蒸
季子合從元有計亞夫堅
臥豈無能何當再接星
堂戰頭上同雲黑未曾

仁輔以詩見欸復用前韻并東方石

雪裏降城百二層
素車今日愧君登
力勦豈謂心能怯
顏赭空驚汗欲蒸
謀楚似聞王翦老
禦秦猶有謝安能
無端又作衝寒戰
袖手惟應巧匠曾

雪再作再疊前韻聊用自詠

睡起空階薄霰層
高堂片雪已先登
鄭橋路隔新風景

馬館寒空舊燠蒸

馬融嘗在史館燠蒸如坐甌思陰山層水清物祗餘陶鼎

在晚交惟有竹君能孤吟寂寞無人和時問門前客到

曾

次韻答時雍

誰是乖崖一字師須將得失寸心知君才絕我寧論倍
世事於人大忌隨是玉也須懷卞氏有金休把鑄鍾期
十年道義相看地猶落殘葩與刺枝

次韻答若虛

雪外樓高碧瓦層江南江北望中登寒愁夜壘軍聲亂
暖憶春湖水氣蒸酣飲縱教豪客醉凍吟輸却腐儒能
西堂杏酪清堪比獨坐懷人此意曾

立春後一日席上次若虛韻

地近彤樓御氣邊苑花宮柳意先傳三冬閏月留餘日
兩度春風共一年庭淺恨無投轄井酒窮須辦典衣錢
瓦杯陶鼎能留客未愧烹肥與擊鮮

再用韻促諸秋官和章

雪堂開卷坐分層自掃西階待客登盟在豈應寒似水
心煩長使熱如蒸驅車路熟朝停慣刻燭才多夜坐能
獨有東鄰老同姓為予談笑解圍曾

讀楊尚寶叔簡潮縣懷蒙泉岳翁詩有感次韻

門戶凋餘祗弟兄憶公於此最傷情囊空始信生前計
棺蓋從他世上評古墓回車誰腹痛遺文在篋我心驚
楊時語及家集符臺老友今頭白幾向荒村問縣名

賀周原已得男再用瓜祝韻

原已匏庵外甥

宜男嘉祝未云賒吉兆今符第幾瓜西海又傳桃實大
東樓初記斗杓斜桓郎未必無佳客王氏從來有外家
聞說賀筵多異品尚方新賜小團茶

題王允達中書所藏宋仲珩草書卷後

羅山令子華川裔前後清朝兩舍人幾世通家同骨肉
數行遺墨在風塵典刑尚及吾非晚文獻猶存子未貧
江水舊多元祐鬼恐驚風浪出通津

徐用和御史墓山八韻

金山埋玉

金山四面擁佳城，玉樹埋時不復榮。
靈氣百年還造化，巖巒千古悶光精。
名同郭璞江心墓，恨比何充地下情。
欲採生芻無處奠，亂沙衰草正縱橫。

玉屏耀金

玉屏開日耀金精，下見扶桑海色明。
綵翠搖空光不定，丹青照眼畫難成。
羊郎晚可移床對，王子朝宜挂笏行。
猶有舊題詩在壁，十年風雨綠苔生。

岡鳳翔雲

岡頭晴翠拂雲開，幻作丹山鸞鷟胎。
五色宛從天上降，一靈真向數中來。
盛時川嶽皆為瑞，奕代文章可比才。
應是思鄉還感舊，可能重上鳳凰臺。

壁池浸月

古墓前頭月一池，壁紋浮動不成漪。
半空影落秋毫見，午夜光生老蚌知。
犀火不勞溫嶠照，錦袍誰賦謫仙詩。
舊遊回首傷心地，又是烟愁雨暝時。

筆架明星

筆架山形奇且牢上與列宿如相遭
光華照地夜初白
蒼翠挿空秋正高
大年登樓手可摘
杜甫上天詩更豪
鄉人翹首望山斗我亦念之心孔勞

冠峯湛露

危峯高聳似我冠
草樹蒙龍露未乾
袍笏儘消狂客拜
風塵不受世人彈
羽幢朝嶽雲中降
鰲首當空海上看
下有白頭未死地
石門空枕夜臺寒

圭田秋穫

臺府官清只俸錢十年祭有大夫田人間耒耜秋風裏
路遠桑麻夕照邊見說承家須主祀況聞憂國願豐年
平泉花樹真何物猶辱先人戒子篇

茅屋時思

報德難忘寸草私多愁長廢蓼莪詩也知春雨秋霜意
猶似晨興夜寢時種得松楸成古墓採將蘋藻薦新祠
欲憑此恨東歸海江水無情去不知

欽定四庫全書

懷麓堂集

懷麓堂集卷十三